

«Det finnes et mål, men ingen vei»

Denne aforismen av Franz Kafka har vorte brukt som fortolksramme ved lesing av romanen hans *Slottet*. *Slottet* handlar om landmålaren K. som kjem til ein framand landsby ved foten av eit slott. Slottsherren skal ha lova han arbeid, men han vert verken godteken eller avvist. Historia følger K. i hans fåfengde kamp for å kome seg inn i slottet.

Slik K. vadar rundt i metervis med snø saman med to heller ubrukelege hjelparar for å prøve å finne vegen til slottet, ser det ut til å fortone seg for pasientar og kollegaer rundt om i landet i høve til NAV om dagen. No finst det vel ein veg, men den er jammen vorte kronglete! Vi høyrer om opp til 12 vekers ventetid på dagpengar, arbeidsledige må på sosialen, eit års ventetid på behandling av uføresaker, alt frå tildeling av frikort til utbetaling av svangerskapspengar, tek månadsvis. I tillegg er telefontilgjenga under ein kvar kritikk, og manglande kunnskap og kompetanse på dei lokale NAV-kontora medfører stadig større distanse til brukarane. Intensjonen med reforma var stikk motsett; brukarane skulle møte eit forenkla system, dei skulle få ein saksbehandlar som hadde kompetansen som skulle til for å geleide dei trygt gjennom systemet og sikre at rettar vart oppfylte. Ein god tanke, sjølv sagt, men NAV ser førebels ut til å likne meir på Vasa-skipet.

Tiltak er sett inn for å bøte på den vanskelege situasjonen, medan ministeren som stod i spissen for gjennomføringa av NAV-reforma no er helseminister. I april ventar vi resultatet av ei ny reform: samhandlingsreforma. Det er altså spennande tider! Det ser ut til å bli ei primærhelseriform, vidare er det lagt vekt på at samarbeidet mellom primær- og spesialisthelsetenesta skal forbetra; ergo samhandling. Her er det pengar å spare. Fastlegeordninga er også under press. Ministeren har hatt utspel om at listetaket skal ned, at det skal satsast meir på førebygging, at fastlegane skal ut av kontora sine og bruke meir tid på mellom anna sjukeheimar, i fengsel og på skular. Dette har skapt dels hissig debatt. At departementet ikkje lenger skal kunne delegera godkjenning av nye spesialistar til foreningsnivå, har òg vekt kontroversar. Brukarundersøkingar viser for øvrig at fastlegeordninga fungerer godt, noko som må vere viktig å understreke i denne prosessen, og sjølv om det alltid er rom for forbettingar, må det vere eit godt råd til ministeren å la grunnmuren stå.

Apropos førebygging, så har dette nummeret av Utposten tre ulike artiklar som omhandlar dette feltet. Først Betty Pettersen, som har skrive eit doktorgradsarbeid om utviklinga innan norsk samfunnsmedisin dei seinare åra. Nokre resultat frå dette arbeidet vert presentert, og dei viser mellom anna at talet på arbeidstimer for legar i faget systematisk har gått nedover. Dersom det skal leggjast vekt på førebygging og iverksetjing av helsefremjande og sjukdomsbehandlande tiltak på gruppenivå i samfunnet vårt, som ministeren ser for seg, er det nyttig å sjå på kva faktorar Pettersen har funne som har medført reduserte legeårsverk i samfunnsmedisinen, når helsemessige utfordringar i samfunnet heller skulle tilseie det motsette.

Vidare kan vi lese om utbrotet av norovirus på Clarion Hotell Gardermoen i haustr, der over 200 personar vart sjuke. Uheldigvis oppstod dette under diabetes forbundet sitt 60-årsjubileum, noko som sjølv sagt kompliserte situasjonen og den påfølgjande handteringa av denne. Innan smittevern har vi også ein artikkel om spritvask i barnehagar. Om det verkeleg har infeksjonsreduserande effekt, er enno ikkje klarlagt, men vi meiner at det er viktig også å presentere resultat av studiar som har eit negativt resultat.

Vi vil nytte høvet å ønske velkommen Legeforeininga sin nye generalsekretær, Geir Riise. Tom Sundar har intervjuet Riise og vi møter ein mann med ei spennande yrkeskarriere bak seg, stort engasjement og lang fartstid i organisasjonslivet. Hans røynsle frå HMS-arbeid og i den samanheng vektlegging av eit godt arbeidsmiljø for bevaring av god helse og reduksjon av sjukefråvær, er spesielt interessant synast vi.

At bestilling av time hos legen for nokon av oss kan fortone seg som eit slott, er vel ikkje det vi allmennlegar tenker mest over i kvardagen. Inger Marie Lied skriv innsiktfullt om pasientrolla og om korleis det er å ha regelmessig kontakt med helsevesenet på grunn av kronisk sjukdom. Eit viktig poeng er problematiseringa av at alle skal sjåast på som ein ressurs. NAV-reforma var vel også tenkt som eit verkemiddel for å få fleire i arbeid, men dette stadige fokuset på den såkalla arbeidslinja, seier noko om korleis vi ser på dei svake i vårt samfunn. Lied påpeikar at ikkje alle faktisk er i stand til å bidra i samfunnsmaskineriet, at nokre mest av alt er ei byrde, men at det må vere plass til dei også.

Lisbeth Homlong